

Aningaasanut inatsimmi konto pingaarneq 64.01.05 naapertorlugu inuussutissarsiutitigut nunaqarfinnut isorliunerusunullu siuarsaanermik tapiissutinik suliassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqququtillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.

Inatsisartunut ilaasortaq Aqqaluaq B. Egede, Inuit Ataqtigiit

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Inuussutissarsiornermut Aatsitassanullu Ataatsimiititaliap suliarinninnermini kingullertigut inuttarai:

Inatsisartunut ilaasortaq Henrik Fleischer, Siumut, Siulittaasoq
Inatsisartunut ilaasortaq Múte B. Egede, Inuit Ataqtigiit, Siulittaasup tullia
Inatsisartunut ilaasortaq Aqqalu Jeremiassen, Atassut
Inatsisartunut ilaasortaq Hermann Berthelsen, Siumut
Inatsisartunut ilaasortaq Steen Lynge, Demokraatit
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Tillie Martinussen, Suleqatigiissitsisut

1. Siunnersuutip imarisai siunertaalu

Konto pingaarnermi 64.01.05-imi inuussutissarsiutitigut nunaqarfinnut isorliunerusunullu siuarsaanermik tapiissutinik suliassap Namminersorlutik Oqartussanit kommuninut nuunneqarnissaa siunnersuummik siunertaavoq. Taamatuttaaq ajornartorsiutip taassuma kommuninut ataatsimut tapiissutit pillugit isumaqatigiinniarnerni ilanngunneqarnissaa siunnersuuteqartumit kissaatigineqarpoq.

2. Inatsisartuni siunnersuummik siullermeerinnineq

Oqaluuserinninnermi inuussutissarsiutinik siuarsaanermik suliniarnerup pitsaanerpaamik aaqqissuunneqartariaqarnera, nunaqarfinni avinngarusimanerusunilu ineriartornermik aningaasaqarnikkullu siuariartornermik pilersitsinissaq pillugu partiit assigiinngitsunik isiginneriaaseqarput.

Oqaluuserinninnerup aallaqqaataani partiinit siunnersuummut matumunnga tapersiineq killeqarpoq Naalakkersuisullu itigartitsillutik. Oqaluuserinninnerulli ingerlanerani partiit malittuanik assigiimmik isummersinnaanerannut periarfissaqartungalerpoq. Taamaammat periarfissaq taassuma ataatsimiititaliami sulinermi aqutissuunneqarsinnaaqullugu siunnersuut Inuussutissarsiornermut Aatsitassanullu Ataatsimiititaliamut suliaassanngorlugu innersuunneqarpoq.

3. Apeqqutit

Ataatsimiititaliaq isumaliutissiisummut atugassaminik apeqquiorpoq. Ataatsimiititaliap apeqqutai Naalakkersuisullu akissutaat isumaliutissiisummut matumunnga ilanngussaatur ikkunneqarput.

4. Ataatsimiititaliap siunnersuummik suliarinninnera

Ataatsimiititaliap aallarniutigalugu oqaatigisariaqarjaa, siunnersuummik tapersiineq assigiinngisitaarmat Naalakkersuisunillu akissuteqaatikkut siunnersuutip imarisai siuarsarneqartariaqartutut nalilerneqanngitsut. Naalakkersuisulli akissuteqaatimikkut toqqaannartumik siunnersuut piviusunngortinneqarsinnaanngitsutut nalilinngilaat, taamaattorli siunnersuut nunaqarfinni avinngarusimasunilu inuussutissarsiutitigut siuarsaanermut pitsaaqutinik imaqtutut nalilernagu. Tamatuma saniatigut Naalakkersuisut uparuaataat aningaasaliissutit - kommuninut nuunneqarpata/raluarpata – siunertamut atorneqanngitsoorsinnaanerannik annilaanngatiginninnermik tunngaveqarput. Taamaammat ilaatigut tunngavilersuutit isummallu oqaluuserinninnermi saqqummiunneqartut tunngavigalugit siunnersuut pillugu qulaajaajumalluni arlalinnik apeqquteqarnissaminut ataatsimiititaliaq tunngavissarsivoq. Ataatsimiititaliap siunnersuummik suliarinninnermini ataatsimiititaliap apeqqutai Naalakkersuisullu akissutaat isumaliutissiisummi matumani misissuataarniarpai. Ataatsimiititaliap ilaatigut apeqqutigaa;

- a) *Kommuninut, sumiiffinni inuussutissarsiorfinnik suleriaatsinillu ilisimasalinnut, attuumassuseqalersitsisoqarpat aningaasaliissutit atuuffissaannut atorneqarnerulernissaaq qulakkeerneqarsinnaava?*

”Aalajangersimasumik aningaasaliissutaasut tunngaviusumik illoqarfinni inuussutissarsiorfinnik kiisalu suliffeqarnermut ilisimasalinnit ingerlanneqartarput. Ullumikkut kommunit nunaqarfiit suleqatigalugit suliniutit tapersersortikkumasat nalunaarsorneqartarput. Tulliuttut Naalackersuisut qulakkiigassaraat aningaasaliissutit nunaqarfinni inoqarfinnilu isorliunerusuni suliniutigineqarumasunut atuunnissaat. Taamaasiornikkut aningaasat kommunimi nalinginnaasumik ingerlatsinermut attuumassuteqannginnissaat qulakkeerneqartarpoq, aningaasallu tunniunneqartarput illoqarfinni, nunaqarfinni inoqarfinnilu isorliunerusuni suliniutaasunut tapersersorusunneqartunut toqqaannartumik atorneqarnissaannut tunniunneqarnissaannullu qulakkeerneqartarluni.

Taamaaliornikkut maannakkumut aningaasaliissutinik ingerlatseriaatsimi qulakkeerneqartarpoq illoqarfimmi kommunit nunaqarfiillu namminneerlutik suliniutit toqqagaat tapersersorneqarnissaat, taakkuuppullu taperneqartartut. Taamaattumik maannakkumut ingerlatsinermi aningaasaliissutit illoqarfinni ilisimannittunit aalajangiiffigineqartarput qanoq agguataarneqassanersut, aaqqissuussamillu kinguneqartitsisoqartarpoq qulakkeerniarlugu illoqarfimmiut kissaataasa naammassineqarnissaat.”

Naalackersuisut akissuteqaamminni innersuussutigaaat nunaqarfinni avinngarusimasunilu inuussutissarsiutinik siuarsaanermut aningaasaliissutit Naalackersuisut naliliinerat malillugu nunaqarfiit kommunillu suleqatigalugit sumiiffimmut pituttorsimasumik aallaaveqarluni atorneqareersut. Paasissutissanik Naalackersuisut apeqqummut matumunnga akissutaasa imarisaanik assortuussinnaasunik ataatsimiititaliaq maannakkut peqanngilaq.

b) Siunnersuut sutigut marloqiusamik suliaqartarnermik appaasutut Naalackersuisut nalilerpaat?

“Maannakkumut aaqqiissutaasimasooq eqqarsaatigalugu nunaqarfinnut inoqarfinnullu isorliunerusunut inuussutissarsiornermi ineriartortitsinissamut tapiissuteqartarnermut tunngatillugu marloqiusamik allaffissortoqarneq ajorpoq. Ullumikkut kommunit suliniutinik toqqaallutillu ingerlatsisuusarput. Taamaattumik suliniutit marloqiusamik allaffissuutigineqarneq ajorput.

Naalackersuisut allaffissornikkut nakkutilliisussaataaneq kisiat paarivaa, tassuunalu qulakkiissallugu aningaasaliissutit siunertarineqartumut tuttarnissaat. Oqartussaarfinni ingerlatsinermi nakkutigineqartuaannartussaavoq aningaasaliissutit siunertamut atorneqarnersut. Kommunit aningaasanik aqutsilissagaluarpata allatigut allaffissornikkut nakkutilliinissaq aaqqissuunneqassaaq. Tamanna isumaqarpoq kommunit Namminersorlutillu Oqartussat iluanni allaffissortoqarnerunissaa, tassami aningaasat

aqunneqarnissaat eqqarsaatigalugu nutaamik aaqqissuussisoqartariaqassagami. Taamaaliortoqassappallu marloqiusamik allaffissortoqaleriasaarsinnaaneq pilersinnaavoq.

Taamaattumik aningaasaliissutit kommuninut nuunneqarneratigut allaffissornerup annikillisaaffigineqarnissaa naatsorsuutigineqanngilaq.

Qanorluunniit pisoqaraluarpat Naalakkersuisut isumaqarput, pingaarnerpaasoq qulakkiissallugu Inatsisartut kissaatigisaattuut aningaasat nunaqarfinnut atorneqassasut. Aaqqissuussinermi allannguisoqassappat aningaasallu Kommuninut Ataatsimoortumik tapiissutinut ilanngunneqassagaluarpata eqqaaneqareersutuut aningaasat nunaqarfinnut atorneqarnissaat qulakkeerneqarsinnaanngilaq.”

Aaqqissuussinikkut maanna atuuttuklut marloqiusamik aqutsisoqanngitsoq Naalakkersuisut isumaqartut ataatsimiititaliap paasivaa. Tamanna aningaasat pineqartut atorffissaminnut atorneqarnissaannik qulakkeerinissaq kisiat siunertaralugu allaffissornikkut nakkutilliisutut atuuffeqarnerminnik Naalakkersuisut namminneerlutik paasissutissiimmata. Taamatuttaaq aningaasat ataatsimoortumik tapiissutit aqutigalugit Inatsisartunit kissaatigineqartutut atorneqarnissaat teknikikkut qulakkeerneqarsinnaanersoq qularutigalugu nangaanartoqartikkitsik Naalakkersuisut oqaatigaat.

- c) *Kommunini nammineq ingerlatsinissaq eqqarsaatigalugu, teknikkitigut periarfissaava nunaqarfinnut inoqarfinnullu isorliunerusunut inuussutissarsiutinik inerisaanissamut tapiissuteqarnissaq kommuninut tunniunneqarneratigut, kommunillu ukiumut aalajangersimasumik minnerpaamik nunaqarfinni inoqarfinnilu isorliunerusuni inuussutissarsiunik inerisaanissaanut atuisarnissaa – tassa imaappoq aningaasaliissutissat Namminersorlutik Oqartussaniikkunnaarlutik siunertarmut atugassanngorlugit kommuninut tunniunneqarsinnaappat?*

“Aallaqqaasiutigalugu aallarniutigisannut innersuussissaanga, tassanilu allassimavoq Naalakkersuisut naliliinera tunngavigalugu tamanna periarfissaanngitsoq, takuuk Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni § 25-mi imm. 2.¹

Aammattaaq aallarniutigalugu oqaatigineqartuni allassimasoq alla qiviaqquneqarpoq, tassami allassimammat aningaasaliissutit kommunini allaffissornikkut suliarineqartalissappata misissorluarneqartariaqartoq Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisaanni allannguisoqartariaqarnersoq.”

¹ Ataatsimiititaliaq tassunga atatillugu Naalakkersuisut ataatsimiititaliap apeqqutaanut akissutaannut innersuussissaq, tassani inatsisilerinikkut pissutsit pillugit tunngaviumik apeqqutit siunnersuutip piviusunngortinneqarsinnaaneranut akornusiuttut pillugit Naalakkersuisut nassuiaateqarput

Aallarniutigalugu quppernerup naqqani innersuussut nr. 1 innersuussutigineqarpoq, tassani Naalakkersuisut aallarniutaasumik nassuiaataat, Naalakkersuisut ataatsimiititaliap apeqqutaanut akissutaannut ilanngullugu nassiunneqartoq innersuussutigineqarluni. Naalakkersuisut qulaani akissutaanni ilaatigut allassimavoq nunaqarfinni avinngarusimasunilu inuussutissarsiutinik ineriartortitsinermut aalajangersimasumik minnerpaamik amerlassusilerlugit atuinissamut kommunit pisussaaffilerneqarsinnaanngitsut naliliisoqartoq.

4.1 Allanguutissatut siunnersuummut tunngatillugu apeqqutit ataatsimiititaliamit saqqummiunneqartut

Aalajangiiffigisassatut siunnersuummut allanguutissatut siunnersuummik saqqummiussisoqarpoq. Aalajangiiffigisassatut siunnersuummik matuminnga suliarinninnermut atatillugu ataatsimiititaliaq naliliivoq allanguutissatut siunnersuutip inatsisitigut aningaasaqarnikkullu kingunerisinnaasai aamma qulaajarneqartariaqartut. Tamanna tunngavigalugu ataatsimiititaliaq ataani apeqqutinik Naalakkersuisunut nassiussivoq.

(Imm. 39-mut) allanguutissatut siunnersuummut apeqqutinut akissutit

- a) *Qulaani paasinnittariaaseq aallaavigalugu inuussutissarsiutinut inerisaanissamut inuussutissarsiutinullu tapiissutissat tamakkiisut qanoq annertutigisut kommuninut nuunneqarniarpat?*

“Qulaani inuussutissarsiutinut inerisaanissamut aningaasaliissutissatut inuussutissarsiutinullu tapiissutissat taaneqartut eqqarsaatigissagaanni aningaasanut inatsimmi kontut pineqartut tassaapput:

- Konto 64.01.05 ”Nunaqarfinnut inoqarfinnullu isorliunerusunut inuussutissarsiornermi inerisaanissamut tapiissutit”, taakkualu AIS 2020 malillugu 5,89 mio. kr.-iupput. Oqaatigineqareersutuullu Naalakkersuisut naliliinerat tunngavigalugu misissorneqartariaqarpoq aningaasaliissutit kommuninut nuunneqassappata inatsisini allannguisoqartariaqassanersoq.
- Konto 64.10.32 ”Inuussutissarsiunik ineriartortitsinissamut suliniutit”, tassanilu pineqarput:
- Annikitsumik taarsigassarsinnaaneq, Greenland Businessiminngaanniit aaqqissuunneqarpoq. AIS 2020 malillugu aningaasat 500.000 kr.-itut nalunaarsorneqarsimapput.
- Greenland Businessimut kiffartuussinissamik isumaqatigiissusiortoqarnikuuvoq, isumaqatigiissuteqarnerlu 31. December 2021-ip tungaanut inissineqarnikuulluni, oqaatigeriikkatuullu taanna Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat malillugu allaffissornikkut isumaqatigiissusiorfigineqarsimavoq. AIS 2020 malillugu aningaasat 9,149

mio. kr.-iupput, taakkunangalu tapiinernut allaffissornermullu 6,7 mio. kr. atorneqassapput 2,449 mio. kr.-illu inuussutissarsiutilinnut siunnersuinernut atorneqassallutik.

- Islandermiut, Savalimmiormiut Norgemiullu isumaqatigiissuteqarfigineqarneratigut Nunat avannarliit akornanni suleqatigiissutaasoq, NORA tapiiffiqineqassaaq. Taakkunungalu AIS 2020 malillugu 250.000 kr.-it aningaasaliissutaassapput.
- Inuussutissarsiutinut siuarsaanermut atugassat allat. AIS 2020 malillugu 1,681 mio. kr.-it aningaasaliissutigineqassapput.
- Konto 64.10.34 "Savat toqoraavinnut assigisaannullu Kiffartuussinissamut isumaqatigiissutit"-ni ingerlatsinissamut isumaqatigiissusiortoqarsimavoq AIS 2020-lu malillugu 2,23 mio. kr. tunisassiorfissat ingerlanneqarnissaannut kiffartuussinissamut isumaqatigiissutinut atugassatut illuartinneqarsimapput. Eqqaariikkattuut kommunimi taamaattunik suliaqartoqarnissaq inatsisitigut allannguiffiusariaqarnersoq misissorneqartariaqarpoq."

b) *Nalilersuinerit aallaavigalugit aningaasaliissutit taamaattut inuussutissarsiornermi inerisaanissamut inuussutissarsiornermilu tapiinissamut tunngassuteqartut pillugit maannakkumut kommunit allaffissornikkut sulisinnaasunik pisariaqartinneqartunik sulisoqarpat?*

"Inuussutissarsiornermi inerisaanermi aqqissuussaannermi maannakkut Greenland Businessimit ingerlanneqartumi maluginiaqquneqarpoq, Greenland Businessi ullumikkut sulisoqarmat aningaasaliinermi inuussutissarsiornermilu siuarsaanermi immikkut ilisimasalinnik. Nalilersuinerit aallaavigalugit kommunini ataasiakkaani aningaasaliissutit taamak ittut ingerlanneqalissappata ullumikkut taamannak ilisimasaqartigisunik attassiniarneq ajornakusoorsinnaavoq. Oqaatigineqareersutuut Greenland Businessiminngaanniit maannakkut allaffissorneq 2021-mi decembarip 31-ata tungaanut ingerlanneqarpoq. Allatut aqqissuussat eqqarsaatigalugit misissorneqartariaqarpoq kommuninit tapiisarnerit ingerlanneqassappata inatsisitigut allannguisoqartariaqarnersoq."

c) *Inuussutissarsiutini inerisaaniarnermi aningaasaliissutit inuussutissarsiutinullu tapiissutit tamakkiisumik kommuninut tunniunneqassagaluarpata nuna tamakkerlugu inuussutissarsiutini inerisaaniarnermut suut iluaqutaasussatut ajoqutaasussatullu Naalakkersuisunit nalilerneqarpat?*

"Qulaani aningaasaliissutit suliassallu kommuninut tunniunneqassagaluarpata Inatsisartut Naalakkersuisullu nuna tamakkerlugu inuussutissarsiutinut inerisaaniarnermi politikkiliorneqarnissaannut periarfissamik annaasaqaataassaaq.

Inuussutissarsiutini inerisaanermut aningaasaliissutit inuussutissarsiutinullu tapiissutit kommuninut tunniunneqassagalarpata iluamik iluaqutaasinnaasunik taasassaqarpallaanngilaq. Killormuanik maannakkut aaqqissuulluakkamik ingerlaavartumillu nunaqarfinnut ingerlanneqartarneri malinnaavigineqartarput. Aningaasallu pineqartut Kommuninut tamakkiisumik tapiissutinut ilanngunneqaralarpata aningaasat siunertarmut atorneqanngitsoornissaat pisinnaalluni takuuk aallaqqaasiutigalugu oqaatigineqartut.

Aammattaaq Naalakkersuisuninngaanniit nalilersuinerit aallaavigalugit Inuussutissarsiutinik siuarsaanermik suliaqartartunut Greenland Businessimut, maannakkumut inatsisit malillugit inuussutissarsiutinut inerisaanermut aningaasaliissutinik tunniussisartut, suleqatigineqarneri naammagisimaarneqarluarpoq. Pingaartumillu aamma Greenland Business peqatigalugu siunissamut ungasinnerusumik aallarnisaasunut inuussutissarsiorderup iluani tapiissuteqarnermut siunnersuinernullu tunngatillugu siunissami ungasinnerusumi iluaqutaasinnaasunik qulakkeerinnittoqarnissaanut isumaqatigiissuteqartoqarsinnaanera nalilerneqarpoq. Kiisalu Greenland Businessiminngaanniit inuussutissarsiutini inerisaanermut iluani ilisimasat pingaarutillit pigineqarput, suliassallu oqartussaqaarfinnut allanut ingerlateqqinneqarpata ilisimasat tamakkua annaaneqarsinnaapput.”

- d) *Suliassaqaarfiup iluani ataatsimut kommuninut nuutsitserusunermut tunngatillugu arlaatigut inuusstissarsiorderup iluani inatsiseqarpa ilaatigut allanngortariaqakkamik imaluunniit atorunnaarsittariaqakkamik?*

“Qulaani aallarniutit oqaatigineqartut qimerluualaaqquneqarput, tassanilu allassimavoq misissuilluartoqartariaqartoq kommunit nunaqarfinni inoqarfinniluunniit isorliunerusuni inuussutissarsiordermi siunarsaanermik siunertalimmik akisussaaffimmik tigusinnissappata, naatsorsuutigineqarsinnaassasorlu Kommunit inuussutissarsiutini il.il. naingaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisaat allannguisoqarnissaa. Tamannalu ilaatigut aamma atuutissaaq ingerlatsinissamut isumaqatigiissutaasimasunut aningaasaliissutissat assigisaallu, tassanilu ilaatigut AIS 2020-mi 2,23 mio. kr.-nit tunisisarfiit ingerlanneqaannarnissaannut kiffartuussinissamut isumaqatigiissusiortoqarsimanera.

Inuussutissarsiutini siuarsaanissaaq eqqarsaatigalugu suliaq maanna Greenland Businessimit ingerlanneqarpoq, siusinnerpaamillu kommuninut aatsaat 2022-mit atuutilersussamik isumaqatiginninniartoqarsinnaavoq, maannakkumummi Greenland Businessimut isumaqatigiissutaasoq 2021-mi decembarip 31-ata tungaanut atuukkami.”

- e) *Piffissaaq killiliussaaq (2020-mi januaarip aallaqqaataa) Naalakkersuisuninngaanniit oqaasissaqaarfigineqarpa?*

“Qulaani oqaatigineqareersutut allannguutissasut taaneqartut 2020-mi januaarip aallaqqaataaniit atuutilerneqarsinnaanngillat. Tassungalu ilaatigut peqquataavoq misissorluarneqaaqqaariaqarmat Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisaanni allannguisoqarnissamik pisariaqartitsisoqarnerseq.

Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaanni § 10-mi allassimavoq, allaffissornermik suliaqarsinnaasunut inuussutissarsiutinut tapersersuiniarnermi allaffissornerq pillugu isumaqatiginninniartoqarsinnaasoq. Maannalu Greenland Businessimut kiffartuussinissamut isumaqatigiissusiortoqarnikuuvoq, isumaqatigiissullu 2021-mi decembarip 31-anut atuuppoq. Taamaasilluni isumaqatigiissummik allanngui neq aatsaat atuutilersinnaavoq 2022-p aallartinnerani.”

f) *Naalakkersuisut naliliinerat aallaavigalugu allannguutissatut siunnersuut sutigut marloqiusamik allaffissornermi annikillisaataasinnaava?*

“Akissut takuuk b) siunnersuutaasimasoq siulleq pillugu.”

Inatsisilerinikkut teknikikkullu pissutsinik arlalinnik allannguutissatut siunnersuutip ilusiliinissamulluunniit piumasaqaammik naammassinnikkaluaruni piviusunngortinneqarsinnaanernik akornusiisunik Naalakkersuisut tikkuagaqarput. Tassani aamma ilaatigut qanoq annertutigisumik inuussutissarsiornermut suliaasaqarfimmi inatsimmik annertunerusumik iluarsartuusseqqittoqartariaqarsinnaanerata nassuiarneqarnissaanik misissorneqarnissaanillu pisariaqartitsineq tikkuarneqarluni. Tamatumani ilaatigut kommunit inuussutissarsiornikkut ingerlatsinernik il.il. aningaasaliissuteqarnikkut inuussutissarsiornikkut ineriartortitsinernut tapiissuteqarsinnaanerata pillugu Inatsisartut inatsisaata allanngortinneqarnissaa pisariaqarnerseq qulaajarneqarluni. Tamanna aamma assersuutigalugu ingerlatsineq il.il. pillugit isumaqatigiissutinut atuulluinnarpoq, AIS2020-imi tunitsivinnik ingerlatsineq pillugu kiffartuussinissamut isumaqatigiissutinut 2,23 mio. kr.-inik immikkoortitsisoqarsimavoq. Naalakkersuisut akissutaanni pasinarsisungavoq siunissami inuussutissarsiornikkut ineriartortitsilluni iliuseqarnerup tamarmiusup kommuninut nuunneqarsinnaanera pillugu inatsisinik iluarsartuusseqqittoqartariaqarsinnaanersoq pillugu qulaajaanermik suliaqartoqassasoq.

4.2 Allanguutissatut siunnersuut

Siullermeerinninnermi Inuit Ataqtigiinnit allanguutissatut siunnersuummik saqqummiussisoqarpoq. Taanna ima oqaasertalerneqarsimavoq:

Aningaasanut inatsimmi inuussutissarsiornermi siuarsaanermik tapiissutitullu aningaasaliissutit, ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqquutillu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Aningaasaliissutit eqaallisaaniarluni nuunneqartussat siunertaminnut atorneqarnissaat suliame qulakkeerneqassaaq..

Aallarniutigalugu immikkoortoq 4.1-imut, allanguutissatut siunnersuutip kingunerisinnaasai pillugit nassuiaateqarfiusumut innersuussisoqarpoq. Allanguutissatut siunnersuutip oqaasertalerneqarneranik misissuinnermi paasinarsivoq taassuma oqaasertalerneqarnera imaqassutsimigut siunnersuutaaqqaartumik siunertarineqartumut piumasagaataasoq naapertorlugu naapertuutinngitsoq. Kontoqarfiup kommuninut nuunneqarnissaa aalajangiiffigisassatut siunnersuutaaqqaartukku kissaatigineqarpoq. Allanguutissatut siunnersuutikkut Naalakkersuisut inuussutissarsiornikkut siuarsaanermik suliassaqarfimmik inuussutissarsiutinullu tapiissuteqartarnermik kommuninut nuusseqqullugit peqquneqarput. Taamaallutik siunnersuutit taakku marluk imaqassutsikkut naammattumik imminnut naapertuutinngillat. Taamaattorli ataatsimiititaliaq Inatsisartullu allanguutissatut siunnersuummik tapersiissagaluarpata allanguutissatut siunnersuummik piviusunngortitsinissamik Naalakkersuisunut kaammattuummik saqqummiussinissaminnut ataatsimiititaliaq Inatsisartullu mattunneqanngillat. Inatsisartut allanguutissatut siunnersuummik akuersissuteqarnissaq toqqassagaluarpassuk siunnersuummik piviusunngortitsinissamik Naalakkersuisut pisussaaffeqassanngillat.

4.3 Ataatsimiititaliap sularinninneranik inaarsaanera

Ataatsimiititaliap maannakkut Naalakkersuisunit akissutit tunngavigalugit aalajangiiffigisassatut siunnersuutip allanguutissattullu siunnersuutip kingunerisassaat qulaajarniarsimalerpai. Ataatsimiititaliaq maanna siuliani sularinninneq tunngavigalugu inassuteqaatiminut ikaarsaassaaq.

5. Ataatsimiititaliap inassuteqaatai


Amerlanerussuteqartut Siumumit, Atassummit Suleqatigiissitsisunit kiisalu Demokratinit ilaasortaatitat siunnersuutip allannguutissatullu siunnersuutip itigartitsissutigineqassasoq inassutigaat

Ikinnerussuteqartut Inuit Ataqatigiinneersut allannguutissatut siunnersuut akuersissutigineqassasoq inassutigaat.

Ataatsimiititaliap taama oqaaseqaateqarluni isumaliutissiisummilu allassimaneratut paasinnilluni siunnersuut aappassaaniigassanngortippaa.




Henrik Fleischer
Siulittaasoq



Múte Bourup Egede
Siulittaasup tullia



Hermann Berthelsen



Peter Olsen



Aqqalu Jerimiassen



Steen Lyng



Tillie Martinussen



Inuussutissarsiornermut, Nukissiupeqarnermut,
Ilisimatusarnermullu Naalakkersuisoq
Jess Svane

Ulloq: 01-10-2019
J.nr.: 01.36.02.03-00242

Imm. 39 pillugu apequtit (inuussutissarsiuutitigut siuarsaanermut tapiissutinik kommuninut nuussinissaq)

Asasara Jess

Ataatsimiititaliap imm. 39-mik suliarinninnerminut atatillugu aalajangiiffigisassatut siunnersuut allannguutissatullu siunnersuut siullermeerinninnermi saqqummiunneqartoq pillugit arlalinnik apeqquteqarnissaminut tunngavissarsivoq.

1. Siunnersuutaqaartoq pillugu apequtit (imm. 39.)

Siunnersuutaqaartoq ima oqaasertalerneqarsimavoq:

”Aningaasanut inatsimmi konto pingaarneq 64.01.05 naapertorlugu inuussutissarsiuutitigut nunaqarfinnut isorliunerusunullu siuarsaanermik tapiissutinik suliasap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut.”

Ataatsimiititaliap paasinninnera malillugu Naalakkersuisut akissuteqaamminni, tapiissutit nunaqarfinni isorliunerusunilu inuussutissarsiuutitigut siuarsaanermut atorneqaratik allanut atorneqarnissaat annilaanngatigalugu tapiissutinik kommuninut ataatsimoortumik tapiissutitigoortitsilernissaq nangaanartoqartippaat. Ataatsimiititaliaq nunaqarfinni isorliunerusunilu inuussutissarsiuutitigut siuarsaanissap pingaartuuneranut allaffissornerullu annikillisartariaqarneranik isummamut isumaqataalluinnarpoq. Taamaammat siuliani pineqartoq tunngavigalugu ataani allassimasutut apeqquteqarnissani ataatsimiititaliap tunngavissaqartippaa.

- a) Aningaasat immikkoortinneqartut kommuninut pituttorneqaraluarpata, taakku sumiiffimmi inuussutissarsiuutinik ingerlatsinermik ilisimasat kiisalu suliffeqarnermi pisariaqartitat tunngavigalugit atorneqarnissaat qulakkeerneqarnerusinnaava?

- b) Siunnersuutip qanoq annertutigisumik marloqiusamik allaffissornermik annikillisaataasinnaanera Naalakkersuisunit naatsorsuutigineqarpa?
- c) Kommunit namminersortinneqarnerat eqqarsaatigalugu – nunaqarfinni isorliunerusunilu inuussutissarsiutitigut siuarsaanermut tapiissutit aqunneqarnerat, kommunit nunaqarfinnik isorliunerusunillu inuussutissarsiutinik siuarsaanermut aningaasanik aalajangersimasunik amerlassusilinnik minnerpaamik atuinissamut *pisussaaffilerlugit*, kommuninut nuunneqarsinnaanerat teknikkkut ajornanngikkaluarpa – tassa aningaasat Namminersorlutik Oqartussanit kommuninut nuunneqartut siunertamut atorneqartussanngorlugit pituttorlugit?

2. Allannguutissatut siunnersuut pillugu apeqqufit (imm. 39)

Siunnersuutip siullermeerneqarnerani allannguutissatut siunnersuummik saqqummiussisoqarpoq. Allannguutissatut siunnersuut ima oqaasertalerneqarsimavoq:

”Aningaasanut inatsimmi inuussutissarsiornermi siuarsaanermik tapiissutitullu aningaasaliissutit ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqufitullu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Aningaasaliissutit eqaallisaaniarluni nuunneqartussat siunertaminnut atorneqarnissaat suliami qulakkeerneqassaaq.”

Siunnersuutaqqaartoq, konto pingaernerup 64.01.05-ip Namminersorlutik Oqartussaniit kommuninut nuunneqarnissaanik ujartuisoq assiginagu, allannguutissatut siunnersuutikkut inuussutissarsiornermi siuarsaanermut tapiissutit inuussutissarsiornermullu tapiissutit aningaasaliissutit Namminersorlutik Oqartussanit kommuninut nuunneqarnissaat kissaatigineqarpoq. Siunertaq tunngaviusoq suliassaqarfimmi aningaasaliissutit tamarmik kommuninut aqutsivigineqalernissaannik kissaateqarnertut ataatsimiititaliamit paasineqarpoq. Suliassaqarfimmik tamarmiusumik kommuninut nuussinerup kingunerisinnaasai qulaajaavigiumallugit ataani apeqqufit suliareqarput.

- a) Qulaani paasinninneq tunngavigalugu, inuussutissarsiutinik siuarsaanermut tapiissutit kiisalu inuussutissarsiornermut tapiissutit tamarmik kommuninut nuunneqassagaluarpata aningaasat katillugit qanoq amerlatigisut tamatumani pineqassagaluarpat?
- b) Kommunit ullumikkut inuussutissarsiutinik siuarsaanermut tapiissutitigut kiisalu inuussutissarsiornermut tapiissutitigut aningaasaliissutinik suliniutinillu tamarmiusunik aqutsinissamut allaffissornikkut naammattunik nukissaqartutut nalilerneqarpat?
- c) Nunami tamarmi inuussutissarsiutitigut siuarsaanikkut suliniutit eqqarsaatigalugit inuussutissarsiutitigut siuarsaanermut tapiissutinik inuussutissarsiornermullu tapiissutinik ataatsimut nuussinermi suut iluaqutissatut, ajoqutissatut kiisalu ulorianaatit Naalakkersuisunit takorloorneqarpat?

- d) Suliassaqarfimmi inuussutissarsiornermut tunngasumi inatsiseqarpa suliassaqarfimmik tamarmiusumik ataatsimut kommuninut nuussinissamik kissaateqarnermik naapertuumalluni allanngortinneqartariaqarsinnaasunik imaluunniit atorunnaartinneqartariaqarsinnaasunik?
- e) Piffissaliinermi killiliussatut siunnersuutigineqartup (1. januar 2020) oqaaseqaateqamissamut Naalakkersuisut tunngavissippaat?
- f) Allanguutissatut siunnersuutip qanoq annertutigisumik marloqiusamik allaffissornermik annikillisaataasinnaanera Naalakkersuisunit naatsorsuutigineqarpa?
- g) Allanguutissatut siunnersuutip kingunerisinnaasaasa qulaajarneqarnissaannut atatillugu Naalakkersuisut attuumassuteqartunik allanik paasissutissiisinnaappat?

Inussiarnersumik



Henrik Fleischer

Ataatsimiititaliap Siulittaasua



Uunga Inatsisartuni Inuussutissarsiornermut Aatsitassanullu Ataatsimiititaliaq

Nunaqarfinnut inoqarfinnullu isorliunerusunut Aningaasanut inatsimmi konto pingaarneq 64.01.05 atorlugu Namminersorlutik Oqartussani inuussutissarsiutinut inerisaanissamut tapiisarnerup kommuninut januaarip aallaqqaataa 2020 aallarnerfigalugu nuutsitsinissamut Inatsisartut aalajangiiffigisassaattut siunnersuut, tassungalu atatillugu kommuninut tamakkiisumik tapiissuteqartarnermut isumaqatiginninniartarnerit 2019-mut attuumasut ilaapput. UKA2019/39

06-11-2019
Sagsnr.

Postboks 1601
3900 Nuuk
Tlf. (+299) 34 50 00
E-mail: isiin@nanoq.gl
www.naalakkersuisut.gl

Ataatsimiititaliaminngaanniit apeqqutigineqarsimasut ataani akineqarput:

Siunnersuut tunngaviusoq, aalajangiiffigisassatut siunnersuut UKA2019/39:

"Aningaasanut inatsimmi konto pingaarneq 64.01.05 naapertorlugu inuussutissarsiutinut nunaqarfinnut isorliunerusunullu siuarsaanermik tapiissutinik suliaassap ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-p ingerlanerani kommuninik ataatsimoortumik tapiissutinik isumaqatiginninniartarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut."

Allannguutissatut siunnersuut saqqummiunneqarpoq siunnersuuterpiaap siullermeerneqarnerani:

"Aningaasanut inatsimmi inuussutissarsiornermi siuarsaanermik tapiissutinullu aningaasaliissutit ulloq 1. januar 2020 aallarnerfigalugu Namminersorlutik Oqartussanit kommuninut nuunneqarnissaanik, apeqqutillu tassunga attuumassuteqartup 2019-ip ingerlanerani kommuninik ataatsimoortumik tapiissutinik isumaqatiginninniartarnermut ilanngunneqarnissaanik Naalakkersuisut peqquneqarnissaat pillugu Inatsisartuni aalajangiiffigisassatut siunnersuut. Aningaasaliissutit eqaallisaaniarluni nuunneqartussat siunertaminnut atorneqarnissaat suliami qulakkeerneqassaaq."

Apeqqutigineqarsimasunut nalinginnaasumik eqqarsaatersuutit

Aningaasaqarnermut ataatsimiititaliaminngaanniit apeqqutigineqartut kommuneqarfinni namminerisamik ingerlanneqarsinnaasut sinaakkutaasullu pillugit pingaaruteqarpoq, taakkualu kommunalbestyrelsip kommunit missingersuusaaannut akisussaaffeqarnerat iserfigineqarpoq.

Kommunalbestyrelsip kommunit missingersuusiortarnerannut tunngatillugu akisussaaffeqarnerat, Kommunit Namminersorlutillu Oqartussat missingersuutaat naatsorsuutaallu pillugit inatsisaat aalajangersarneqarsimavoq. Aalajangersakkami § 20-mi imm. 1-i naapertorlugu aningaasaqarnermut ataatsimiititaliap kommunip ukiumut missingersuussiassaattut siunnersuummik suliaqartussaavoq, taannalu kommunalbestyrelsemi ukiutut naatsorsuiffissatut akuerineqartussanngorlugu saqqummiunneqassalluni. Siunnersuummittaag missingersuutit ukiunut minnerpaamik pingasunoortut ilanngunneqassallutik.

Kommunalbestyrelsinittaaq tulleriaarinissaq akisussaaffigineqartarpoq, inatsisimiillu sinaakkutarisat aallaavigalugit kommunit namminneerlutik kiffartuussissutissatik, kommunit suliffeqarfiutaanni sinaakktissanik anguniagassanillu inissiisarput kiisalu suliaminnik ingerlassinerminni pitsaassutsimik qulakkeerinnissapput soorlutaaq aamma naammassisaqarluartumik kommunip aningaasaqarnera ingerlatissagaat. Akisussaaffimmittaaq aamma ilaavoq kommunalbestyrelseminngaanniit aningaasaliiffissanut tulleriaarinerit, taakkunanilu pineqarput aningaasartuutissat inatsisinut pituttorsimanngitsut. Tamannalu isumaqarpoq kommunalbestyrelseminngaanniit nunaqarfinni inoqarfinnilu isorliunerusuni kommunit aningaasatigut periarfissaqartillugu annikinnerusumik inuussutissarsiutini inerisaanissamut aningaasaliisinnaaneq.

Naalakkersuisuninngaanniillu anguniarneqartarpoq nunaqarfinni inoqarfinnilu isorliunerusuni aningaasanik aalajangersimasunik inuussutissarsiormi inerisaanissamut aningaasaliisoqartarnissaa, tamannalu ukiumut aningaasanut inatsisit aqutigalugit siunertarisamut aningaasaliisoqartarluni.

Anguniagarli tamanna kommunit Naalakkersuisullu akornanni aningaasat aalajangersimasunut tunniussineritigunnaq qulakkeerneqarsinnaanngilaq, tassungalugu peqqutaavoq kommuninut ataatsimoortumik tapiissuteqartarpoq, takuuk § 20-mi imm. 3, tassanilu atuarneqarsinnaavoq kommuninut ataatsimoortumik tapiissuteqarneq aqutigalugu isumaqatigiittoqarsimappat aningaasat aalajangersimasut suliniummumut aalajangersimasumut atorneqassasut, taava kommunininngaanniit missingersuutinut minnerpaamik tapiissutigineqartut siunertaannut atortussatut missingersuutigissavaat. Qulakkeerinnissinnaannginnermullu peqqutaasoq tassaavoq, inatsimmi ilaatillugu § 25-mi imm.2-mi allassimammumut, kommunit aningaasartuutissaanut nakkutilliinermi, kommunit ukiumut naatsorsuutinik suliaqarnerminni namminneerlutik nakkutigissagaat aningaasartuutit sinnerlugit atuisoqassanersoq nakkutigissagaat, ukioq aningaasaliiffiusup aningaasaliiffigineqarsimaneri qaangiiffiginissaanut ilimagisat pitinniarlugit, kommune pineqartoq aalajangertariaqarpoq suliniutissat piviusunngortinnissaat qulakkiissallugit.

Qulaani pineqartut isumaqatigiissutigineqarsimagaluarpataluunniit, kommunalbestyrelseminngaanniit Kommunit Namminersorlutillu Oqartussat missingersuutaat naatsorsuutaallu pillugit Inatsisartut isertitanut aningaasartuutinullu tunngatillugu aningaasaqarnikkut oqimaqatigiissuteqarnissamut tunngassuteqartunik naammassinninniarnannut ajornartorsiutaassanngilaq. Taamaattumillu naak kommunininngaanniit

missingersuutini aningaasat taakkua nunaqarfinnut suliniutissanut atorneqartussatut inissinneqarsimagaluartut, qulakkeerneqarsinnaaneq ajorpoq ilumut aningaasat taakkununga atorneqassanersut.

Aammattaaq maluginiaqquneqarpoq aningaasanik taamaattunik kommunimi allaffissornernut atugassanik tunniussisoqarneq aatsaat pisinnaammat aningaasaliissutissat siunertaat Kommunit inuussutissarsiutini il.il. aningaasaliinermikkut inuussutissarsiutinik ineriartortitsseqataanissaminut periarfissaat pillugit Inatsisartut inatsisaat nr. 23, 18. december 2003-meersumi sinaakkutaasut iluaniissinnaappat. Aalajangersakkami § 3-mi imm. 1-imi ima allassimasoqarpoq:

“Kommunit inatsisit manna malillugu erseqqinnerusumik aalajangersakkani:

1) Suliniaqatigiiffinnut, ingerlatseqatigiiffinnut kattuffinnulluunniit allanut, kommunimi kommuniniluunniit arlaqartuni inuussutissarsiutinik siuarsaanermik siunertaqartunut suliaasatut pilersaarutit il.il. pillugit siunnersuineq aqutigalugu tapiissuteqarsinnaapput. “

§ 4-mittaaq allassimavoq:

“Aningaasaliinermut, qularnaveeqqusiinermut aammalu tapiissuteqarnermut § 3, imm. 1, nr. 2-5 naapertorlugit piumasaqaataavoq, suliaasat suliaasatut pilersaarutitut, suliffeqarfinnut il.il. inuussutissarsiornermik siunertaqartunut aammalu suliaasanut aningaasatigut sinneqartoorteqarnissamik siunertaqartunut attuumassuteqarnissaat.”

Naalakkersuisut naliliinerat aallaavigalugu inatsisitigut sukumiinerusumik misissuisoqartariaqarpoq paasiniallugu inuussutissarsiutilinnut tapiissutigineqartut sorliit inatsisit sinaakkutaasa iluanni tunniunneqarsinnaanersut, tassunga ilanngullugu suliarineqartoq aningaasatigut ilunaarutaasinnaaanissaanik siunertallit, assersuutigalugulu tamanna nunaqarfinnut inoqarfinnullu isorliunerusunut inuussutissarsiornermi ineriartortitsinermut aningaasaliissutaasartut siunertarinngilaat, missingersuusianilu ilaatigut allassimavoq katersortarfiit, kiffartuussisarfiit assigisaasalu takoriaruaqarnerup iluani sinaakkusiilluortoqarnissaanut susasaqartitsisoqarnissaanullu aaqqissornissaannut aningaasaliisoqassasoq.

Taamaattumik misissuilluortoqartariaqaraluarpoq assersuutigalugu kommunit nunaqarfinni inoqarfinnilu isorliunerusuni inuussutissarsiornerup iluani inerisaanissaanut aningaasaliissutinik qulakkeerminninniartoqassappat Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminut periarfissaat pillugit Inatsisartut inatsisaat allannguisoqartariaqassanersoq. Tamannattaaq aamma assersuutigalugu ingerlatsinissamut isumaqatigissutaasut assigisaanullu aningaasaliissutaasunut atuuppoq, AIS2020-milu takuneqarsinnaavoq 2,23 mio. kr,-it tunisivissat ingerlanneqarnissaannut kiffartuussinissamut isumaqatigiissutitut atorneqassasut.

Inuussutissarsiutinut siuarsaanissamut tapiissutaasartut eqqarsaatigalugit tamakku maanna Nunami inuussutissarsiutinut siuarsaanermut tunngatillugu inatsimmi allassimasut malillugit Greenland Businessiminngaanniit ingerlanneqarput, tassanilu maluginiarneqassaaq inatsisit allaffissormertai Naalakkersuisunit akisussaaffigineqarmata. Naalakkersuisullu kommunalbestyrelseminngaanniit imaluunniit allaffissornikkut suliaqartunit allanit tapersersorneqarneq tunngavigalugu oqaaseqaatinik aningaasaliinernilluunniit isumaqatigiissusiorsinnaavoq. Naalakkersuisullu ullumikkut Greenland Businessimut taamannak isumaqatigiissusiorsimapput. Isumaqatigiissut tamanna 2021-mi decembarip 31-anut atuuppoq. Taamaammallu kommunit isumaqatigiissusiorsiorfigineqassagaluarpata tamanna siusinnerpaamik aatsaat 2022-miit atuutilersussamik isumaqatigiissuteqarfigineqarsinnaavoq.

Atuisoqarnermut Unammilleqatigiinnermullu Aqutsisoqarfimminngaanniillu Unammilleqatigiinneq pillugu inatsimmi § 12 pillugu ima oqaaseqaateqartoqarpoq:

“Maluginiarneqartariaqarportaaq aningaasat taakkua oqartussaqaarfikkut iluamik aalajangersaasoqartinnagu kommuninut nuunneqaraluarpata, kommuninninngaanniit aningaasat allaffissornikkut suliarineqarneri Unammilleqatigiinneq pillugu Inatsisartut inatsisaat nr. 1, 15. Maj 2014-imeersumi (unammilleqatigiinnermut inatsit) kapitali 4-mi unammilleqatigiinnermik equitsisumik tapersiineq pillugu allassimasoq malittariaqarpaat. Unammilleqatigiissinnaanermut Ataatsimiititaliaminngaanniit aalajangersakkat aallaavigalugit aningaasanik utertitsisoqarnissaanut peqqussuteqartoqarsinnaavoq, taamaaliortoqarsinnaavorlu tapersersuineq arlaannaatigulluunniit toqqaannartumik toqqaannangikkaluamilluunniit unammilleqatigiinnermut equitsumik siunertaqartoqarsimappat kinguneqarsinnaappalluunniit.”

Inuussutissarsiornermut tapiinerit pineqartut arlallit inatsisitigut aalajangersaaffigineqarnikuunngimmata, kommuninngaanniit tapiissutaasartut Unammilleqatigiinnermut ataatsimiititaliamut suliakkiissutaasinnaasassapput, tapiissutaasullu arlaannaatigulluunniit unammilleqatigiinnissamut equitsisisinnaappata tapiissutaasut uterteqquneqartassapput. Tamannalu maannakkumut aaqqiissutaasumut sanilliukkaanni allaffissornikkut suliarujussuannangussalluni.

Siunnersuutaasimasooq siulleq pillugu apeqqut (imm. 39)

- a) *Kommuninut, sumiiffinni inuussutissarsiorfinnik suleriaatsinillu ilisimasalinnut, attuumassuseqalersitsisoqarpat aningaasaliissutit atuuffissaannut atorneqarnerulernissaaq qulakkeerneqarsinnaava?*

Aalajangersimasumik aningaasaliissutaasut tunngaviusumik illoqarfinni inuussutissarsiorfinnik kiisalu suliffeqarnermut ilisimasalinnit ingerlanneqartarput. Ullumikkut kommunit nunaqarfiit suleqatigalugit suliniutit tapersorsortikkumasat nalunaarsorneqartarput. Tulliuttut Naalackersuisut qulakkiigassaraat aningaasaliissutit nunaqarfinni inoqarfinnilu isorliunerusuni suliniutigineqarumasunut atuunnissaat. Taamaasiornikkut aningaasat kommunimi nalinginnaasumik ingerlatsinermit attuumassuteqannginnissaat qulakkeerneqartarpoq, aningaasallu tunniunneqartarput illoqarfinni, nunaqarfinni inoqarfinnilu isorliunerusuni suliniutaasunut tapersorsorusunneqartunut toqqaannartumik atorneqarnissaannut tunniunneqarnissaannullu qulakkeerneqartarluni.

Taamaaliornikkut maannakkumut aningaasaliissutinik ingerlatseriaatsimi qulakkeerneqartarpoq illoqarfinni kommunit nunaqarfiillu namminneerlutik suliniutit toqqagaat tapersorsorneqarnissaat, taakkuuppullu taperneqartartut. Taamaattumik maannakkumut ingerlatsinermit aningaasaliissutit illoqarfinni ilisimannittunit aalajangiiffigineqartarput qanoq agguataarneqassanersut, aaqqissuussamillu kinguneqartitsisoqartarpoq qulakkeerniarlugu illoqarfinniut kissaataasa naammassineqarnissaat.

- b) *Siunnersuut sutigut marloqiusamik suliaqartarnermik appaasutut Naalackersuisut nalilerpaat?*

Maannakkumut aaqqiissutaasimasooq eqqarsaatigalugu nunaqarfinnut inoqarfinnillu isorliunerusunut inuussutissarsiornermit ineriartortitsinissamut tapiissuteqartarnermut tunngatillugu marloqiusamik allaffissortoqarneq ajorpoq. Ullumikkut kommunit suliniutinik toqqaallutillu ingerlatsisuusarput. Taamaattumik suliniutit marloqiusamik allaffissuutigineqarneq ajorput.

Naalackersuisut allaffissornikkut nakkutilliisussaataaneq kisiat paarivaa, tassuunalu qulakkiissallugu aningaasaliissutit siunertarineqartumut tuttarnissaat. Oqartussaqaarfinni ingerlatsinermit nakkutigineqartuaannartussaavoq aningaasaliissutit siunertamut atorneqarnersut. Kommunit aningaasanik aqutsilissagaluarpata allatigut allaffissornikkut nakkutilliinissaaq aaqqissuunneqassaaq. Tamanna isumaqarpoq kommunit Namminersorlutillu Oqartussat iluanni allaffissortoqarnerunissaa, tassami aningaasat aqunneqarnissaat

eqqarsaatigalugu nutaamik aaqqissuussisoqartariaqassagami.
Taamaaliortoqassappallu marloqiusamik allaffissortoqaleriasaarsinnaaneq
pilersinnaavoq.

Taamaattumik aningaasaliissutit kommuninut nuunneqarneratigut
allaffissornerup annikillisaaffigineqarnissaa naatsorsuutigineqanngilaq.

Qanorluunniit pisoqaraluarpat Naalakkersuisut isumaqarput,
pingaarnerpaasoq qulakkiissallugu Inatsisartut kissaatigisaattuut aningaasat
nunaqarfinnut atorneqassasut. Aaqqissuussinermi allannguisoqassappat
aningaasallu Kommuninut Ataatsimoortumik tapiissutinut
ilanngunneqassagaluarpata eqqaaneqareersutuut aningaasat nunaqarfinnut
atorneqarnissaat qulakkeerneqarsinnaanngilaq.

- c) *Kommunini nammineq ingerlatsinissaq eqqarsaatigalugu, teknikkitigut
periarfissaava nunaqarfinnut inoqarfinnullu isorliunerusunut
inuussutissarsiutinik inerisaanissamut tapiissuteqarnissaq kommuninut
tunniunneqarneratigut, kommunillu ukiumut aalajangersimasumik
minnerpaamik nunaqarfinni inoqarfinnilu isorliunerusuni inuussutissarsiunik
inerisaanissaanut atuisarnissaa – tassa imaappoq aningaasaliissutissat
Namminersorlutik Oqartussaniikkunnaarlutik siunertarmut
atugassanngorlugit kommuninut tunniunneqarsinnaappat?*

Aallaqqaasiutigalugu aallarniutigisannut innersuussissaanga, tassanilu
allassimavoq Naalakkersuisut naliliinera tunngavigalugu tamanna
periarfissaanngitsoq takuuk Kommunit Namminersorlutillu Oqartussat
missingersuutaat naatsorsuutaallu pillugit Inatsisartut inatsisaanni § 25-mi
imm. 2.

Aammattaq aallarniutigalugu oqaatigineqartuni allassimasoq alla
qiviaqquneqarpoq, tassami allassimammat aningaasaliissutit kommunini
allaffissornikkut suliarineqartalissappata misissorluarneqartariaqartoq
Kommunit inuussutissarsiutini il.il. aningaasaliinermikkut
inuussutissarsiutinik ineriartortitseqataanissaminnut periarfissaat pillugit
Inatsisartut inatsisaanni allannguisoqartariaqarnersoq.

(Imm. 39-mut) allannguutissatut siunnersuummut apeqqut

- a) *Qulaani paasinnittariaaseq aallaavigalugu inuussutissarsiutinut
inerisaanissamut inuussutissarsiutinullu tapiissutissat tamakkiisut qanoq
annertutigisut kommuninut nuunneqarniarpat?*

Qulaani inuussutissarsiutinut inerisaanissamut aningaasaliissutissatut inuussutissarsiutinullu tapiissutissatut taaneqartut eqqarsaatigissagaanni aningaasanut inatsimmi kontut pineqartut tassaapput:

- Konto 64.01.05 "Nunaqarfinnut inoqarfinnullu isorliunerusunut inuussutissarsiornermi inerisaanissamut tapiissutit", taakkualu AIS 2020 malillugu 5,89 mio. kr.-iupput. Oqaatigineqareersutuullu Naalakkersuisut naliliinerat tunngavigalugu misissorneqartariaqarpoq aningaasaliissutit kommuninut nuunneqassappata inatsisini allannguisoqartariaqassanersoq.
- Konto 64.10.32 "Inuussutissarsiunik ineriartortitsinissamut suliniutit", tassanilu pineqarput:
- Annikitsumik taarsigassarsinnaaneq, Greenland Businessimnngaanniit aaqquissuunneqarpoq. AIS 2020 malillugu aningaasat 500.000 kr.-itut nalunaarsorneqarsimapput.
- Greenland Businessimut kiffartuussinissamik isumaqatigiissusiortoqarnikuuvoq, isumaqatigiissuteqarnerlu 31. December 2021-ip tungaanut inissinneqarnikuulluni, oqaatigeriikkatuullu taanna Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat malillugu allaffissornikkut isumaqatigiissusiorfigineqarsimavoq. AIS 2020 malillugu aningaasat 9,149 mio. kr.-iupput, taakkunanngalu tapiinernut allaffissornermullu 6,7 mio. kr. atorneqassapput 2,449 mio. kr.-illu inuussutissarsiutilinnut siunnersuinernut atorneqassallutik.
- Islandermiut, Savalimmiormiut Norgemiullu isumaqatigiissuteqarfigineqarneratigut Nunat avannarliit akornanni suleqatigiissutaasoq, NORA tapiiffigineqassaaq. Taakkunanngalu AIS 2020 malillugu 250.000 kr.-it aningaasaliissutaassapput.
- Inuussutissarsiutinut siuarsaanermut atugassat allat. AIS 2020 malillugu 1,681 mio. kr.-it aningaasaliissutigineqassapput.
- Konto 64.10.34 "Savat toqoraavinnut assigisaannullu Kiffartuussinissamut isumaqatigiissutit"-ni ingerlatsinissamut isumaqatigiissusiortoqarsimavoq AIS 2020-lu malillugu 2,23 mio. kr. tunisassiorfissat ingerlanneqarnissaannut kiffartuussinissamut isumaqatigiissutinut atugassatut illuartinneqarsimapput. Eqqaariikkattuut kommunimi taamaattunik suliaqartoqarnissaq inatsisitigut allannguiffiusariaqarnersoq misissorneqartariaqarpoq.

b) *Nalilersuinerit aallaavigalugit aningaasaliissutit taamaattut inuussutissarsiornermi inerisaanissamut inuussutissarsiornermilu*

tapiinissamut tunngassuteqartut pillugit maannakkumut kommunit allaffissornikkut sulisinnaasunik pisariaqartinneqartunik sulisoqarpat?

Inuussutissarsiormi inerisaanermi aaqqissuussaasermi maannakkut Greenland Businessimit ingerlanneqartumi maluginiaqquneqarpoq, Greenland Businessi ullumikkut sulisoqarmat aningaasaliinermi inuussutissarsiormilu siuarsaanermi immikkut ilisimasalinnik. Nalilersuinerit aallaavigalugit kommunini ataasiakkaani aningaasaliissutit taamak ittut ingerlanneqalissappata ullumikkut taamannak ilisimasaqartigisunik attassiniarneq ajornakusoorsinnaavoq. Oqaatigineqareersutuut Greenland Businessiminngaanniit maannakkut allaffissorneq 2021-mi decembarip 31-ata tungaanut ingerlanneqarpoq. Allatut aaqqissuussat eqqarsaatigalugit misissorneqartariaqarpoq kommuninit tapiisarnert ingerlanneqassappata inatsisitigut allannguisoqartariaqarnersoq.

- c) *Inuussutissarsiutini inerisaaniarnermi aningaasaliissutit inuussutissarsiutinullu tapiissutit tamakkiisumik kommuninut tunniunneqassagaluarpata nuna tamakkerlugu inuussutissarsiutini inerisaaniarnermut suut iluaqutaasussatut ajoqutaasussatullu Naalackersuisunit nalilerneqarpat?*

Qulaani aningaasaliissutit suliassallu kommuninut tunniunneqassagaluarpata Inatsisartut Naalackersuisullu nuna tamakkerlugu inuussutissarsiutinut inerisaaniarnermi politikikiliornissaannut periarfissamik annaasaqaataassaaq.

Inuussutissarsiutini inerisaanermut aningaasaliissutit inuussutissarsiutinullu tapiissutit kommuninut tunniunneqassagaluarpata iluamik iluaqutaasinnaasunik taasasaqarpallaanngilaq. Killormuanik maannakkut aaqqissuulluakkamik ingerlaavartumillu nunaqarfinnut ingerlanneqartarneri malinnaavigineqartarput. Aningaasallu pineqartut Kommuninut tamakkiisumik tapiissutinut ilanngunneqaralarpata aningaasat siunertarmut atorneqanngitsoornissaat pisinnaalluni takuuk aallaqqaasiutigalugu oqaatigineqartut.

Aammattaq Naalackersuisuninngaanniit nalilersuinerit aallaavigalugit Inuussutissarsiutinik siuarsaanermik suliaqartartunut Greenland Businessimut, maannakkumut inatsisit malillugit inuussutissarsiutinut inerisaanermut aningaasaliissutinik tunniussisartut, suleqatigineqarneri naammagisimaarneqarluarpoq. Pingaartumillu aamma Greenland Business peqatigalugu siunissamut ungasinnerusumik aallarnisaasunut

inuussutissarsiornerup iluani tapiissuteqarnermut siunnersuinernullu tunngatillugu siunissami ungasinnerusumi iluaqutaasinnaasunik qulakkeerinnittoqarnissaanut isumaqatigiissuteqartoqarsinnaanera nalilerneqarpoq. Kiisalu Greenland Businessiminngaanniit inuussutissarsiutini inerisaanerup iluani ilisimasat pingaarutillit pigineqarput, suliassallu oqartussaqaarfinnut allanut ingerlateqqinneqarpata ilisimasat tamakkua annaaneqarsinnaapput.

- d) *Suliassaqaarfup iluani ataatsimut kommuninut nuutsitserusunnermut tunngatillugu arlaatigut inuusstissarsiornerup iluani inatsiseqarpa ilaatigut allanngortariaqakkamik imaluunniit atorunnaarsittariaqakkamik?*

Qulaani aallarniutitut oqaatigineqartut qimerluualaaqquneqarput, tassanilu allassimavoq misissuilluartoqartariaqartoq kommunit nunaqarfinni inoqarfinniluunniit isorliunerusuni inuussutissarsiornermi siunarsaanermik siunertalimmik akisussaaffimmik tigusinnissappata, naatsorsuutigineqarsinnaassasorlu Kommunit inuussutissarsiutini il.il. naingaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisaat allannguisoqarnissaa. Tamannalu ilaatigut aamma atuutissaaq ingerlatsinissamat isumaqatigiissutaasimasunut aningaasaliissutissat assigisaallu, tassanilu ilaatigut AIS 2020-mi 2,23 mio. kr.-nit tunisisarfiit ingerlanneqaannarnissaannut kiffartuussinissamat isumaqatigiissusiortoqarsimanera.

Inuussutissarsiutini siuarsaanissaq eqqarsaatigalugu suliaq maanna Greenland Businessimit ingerlanneqarpoq, siusinnerpaamillu kommuninut aatsaat 2022-mit atuutilersussamik isumaqatigininniartoqarsinnaavoq, maannakkumummi Greenland Businessimut isumaqatigiissutaasoq 2021-mi decembarip 31-ata tungaanut atuukkami.

- e) *Piffissaq killiliussaq (2020-mi januaarip aallaqqataa) Naalackersuisuninngaanniit oqaasissaqaarfigineqarpa?*

Qulaani oqaatigineqareersutuut allannguutissasut taaneqartut 2020-mi januaarip aallaqqaataaniit atuutilerneqarsinnaanngillat. Tassungalu ilaatigut peqqutaavoq misissorluarneqaqqaariaqarmat Kommunit inuussutissarsiutini il.il. aningaasaliinermikkut inuussutissarsiutinik ineriartortitseqataanissaminnut periarfissaat pillugit Inatsisartut inatsisaanni allannguisoqarnissamik pisariaqartitsisoqarnersoq.

Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaanni § 10-mi allassimavoq, allaffissornermik suliaqarsinnaasunut inuussutissarsiutinut tapersersuiniarnermi allaffissorneq pillugu isumaqatiginninniartoqarsinnaasoq. Maannalu Greenland Businessimut kiffartuussinissamut isumaqatigiissusiortoqarnikuuvoq, isumaqatigiissullu 2021-mi decembarip 31-anut atuuppoq. Taamaasilluni isumaqatigiissummik allannguneq aatsaat atuutilersinnaavoq 2022-p aallartinnerani.

- f) *Naalakkersuisut naliliinerat aallaavigalugu allannguutissatut siunnersuut sutigut marloqiusamik allaffissornermi annikillisaataasinnaava?*

Akissut takuuk b) siunnersuutaasimasoq siulleq pillugu.

- d) *Naalakkersuisut allannguutissatut siunnersuummut atatillugu misissuinerminni allatigut sunniutaasinnaasunik attuumassuteqartunik oqaasissaqarpat?*

Qulaani akissutaasimasut takukkit.

Inussiarnersumik inuulluaqqusillunga
Med venlig hilsen



Jess Svane